

GA NHPAW

Mungkinan kap-bra ana COVID-19 hpe mahtai tam yu ai hku nna, yakhkak jamjau ten ni hta Karai Kasang hpe kamhpa manoi manat ra ai lam ni hpe madung tawn da ai sumrai ni rai nga ai.



Ngai hku nna Karai Kasang hpe ndai coronavirus hpe ya jang jahkring kau shangun mayu nga ai. Nye a matu hte ngai tsawra ai, lanu lahku nga ai masha ni a matu myit tsang nga nngai. Ngai hte nye nta masha ni, shara shagu kaw nga nga ai ni hpe Karai Kasang makawp maga ya na matu, akyu hpyi nga nngai. Raitimung, machyi ai ni, si ai ni grau grau law htam wa nga ai rai nna, nye a myit pu myit tsang lam ni mung du na bat ni na zawn grau sawng wa nga ai.

Lama wa, Karai Kasang n karum yang gara hku di na? Masha hkying kaba si hkrum sai, matut nna mung law law naw si na re. Ya ten du hkra na anhte a mahkrum madup hku nga yang, ndai COVID-19 mungkinan kap-bra ana tsinyam lapran, Karai Kasang *lama ma* galaw na re ngu ai hpe myit mada na matu, gaw mai byin lu na i? Mai ai rai yang, hpa wa rai na ta?

Weyi lam hku tsun ga nga yang, anhte ni malawng maga gaw, “Karai Kasang e, karum la rit,” ngu ai madang kaw rai nga ai. Karai Kasang kaw na kaning re ai karum ya ai lam raitim lu hkra galaw nga ga ai. Anhte kaga ni gaw, “Karai Kasang kanang ta? Karai Kasang anhte a tsinyam ni hpe lanu lahku ya nga ai i? Karum na matu Karai Kasang hpa n galaw ai i? Si htum nga ai lam hpe Karai Kasang n lu jahkring kau ai rai yang, Karai Kasang kaw na anhte hpa myit mada lu na rai ta?” ngu ai grai sungdam ai Karai masa ga-san ni hte kamu hkat taw ai ten mung rai nga ai.

Ndai ga-san ni gaw ngai tinggyeng langai a matu mung, htuk manu taw nga ai, matut nna byin taw na re. Ma hkum ten, ma hkrat ai majaw anhte a shawng na ma si mat ai ten, nye Nu gaw aten galu myit htum myit ru ai lam byin mat ai hte n dum n dam rai mat ai ana hte gasat ai kaw hkrat sum mat sai. Nye a kasha ma *Gam*, shangai ai hpang shani hta ngai nan mung tsi la n mai ai ana byin hkrum wa sai. Dai majaw, ndai zawn re ai ga-san ni law law san byin wa ai. Tsun ga nga yang, “Ngai Karai Kasang hpe kam mai na i? Kam mai ai rai yang, hpa baw a matu kam na?” ngu ai hpe chye mayu wa ai.

Ndai ga-san ni hpe tsinyam tsindam hkrum ai ten ni hta grai nan ra ahkyak nga ai ngu hkam sha ai. Raitim, ngai laning mi hta, shata kru apnawng nga ai Myen mungdan hta masha ni shani shagu hkrum sha nga ai hpe mu ai shaloi, galoi mung sha asan byin nga ai. Tengsha nga yang, ndai ga-san ni gaw ngai hta galoi mung nga nga ai. Hpa majaw nga yang, machye machyang hku nna ngai hpe myit dik shangun ai mahtai ni n nga ai zawn, nye a hkam sha ai lam, yawn ai lam ni hpe tsepkawp shayawm ya lu ai lam mung n nga ai. Karai Kasang a lam anhte grai chye ging ai raitim, n mai chye lu nga ga ai. Anhte kam ai lam hte tatut hkansa ai lam ni gaw, mayak mahkak hte hpa byin na n chye ai shawnglam hpe jum tek ai lam ni hta, grai nan shai hkat nga ai.

Lawu de na sumrai sanit hta, yakhkak jamjau ten ni hta Karai Kasang hpe kamhpa manoi manat na matu, tengman ai Wenyi lam sanit hpe tsun dan mat wa na nngai.

1. Karai Kasang a myitra hte lam ni hpe chyena lu na matu, anhte a atsam marai ni gaw shadang masat nga ai hpe dum ra ai. Karai Kasang jaw ya ai hpe sha hkam la u.
2. Na a prat hpe shabyin ya ai, woiawn ya ai, lam madun ya lu na matu, Karai Kasang hpe myit mada nga u.
3. Tsinyam tsindam lapran kaw myit mada lam hpe jaw ya lu ai, makam masham hpe shangang shakang ya ai, arawn alai hpe gawgap ya lu na matu Karai Kasang hpe myit mada nga u.
4. Hkristu a tsinyam tsinsam hpe garan kachyan lu hkra myit mada u. Shi a hpung shingakang a matu garan kachyan lu hkra myit mada u.
5. Karai Kasang a tsawra myit kaw na nang hpe hpa hte mung jahka kau n lu ai hpe myit dum nga u.
6. Na a myit ru myit tsang lam ni hpe Karai Kasang a lata hta ap da nna simsa ai lam hpe myit mada nga u.
7. Nang hta n hkum n tsup ai, shadang masat nga ai lam hpe hkam la nna Karai Kasang hta ala nga let, ningnan galai shai lu hkra myit mada u.

Ndai sumrai ni gaw, COVID-19 a jahkrit shama ai ten laman, ya anhte kaw nga taw ai ga-san ni mahkra hpe, hta ya lu na gaw n rai nga ai. Myit daw myit hten, ruyak tsinyam ten ni hta, akyu jashawn lu hkra, tengman ai Wenyi lam hpe jaw ya ai lam sha rai nga ai. Ndai ningmu ni gaw Chyum Laika kaw na mabyin lam ni, ngai na mahkrum madup ni hte Hkristan ni law law a shaning na na hkrum kadup wa ai lam ni rai nga ai. Marai langai ngai hpungtang hpaji hku nna chyam dinglik yu let jaw ai ngu madi madun lu nna n re ai sha, ndai lam ni gaw tengman ai lam ni nan rai nga ai. Ndai lam ni gaw jaw nga ai. Hpa majaw nga yang, ndai hpe kam nna dai hte asak hkrung wa ai ni a sakhkrung lam, shanhte a myit masin salum ni hte manu shadan sharawt wa ai majaw rai nga ai. Lachyum rawng, akyu jashawn lu ai lam rai na re ngu myit mada nngai. Bat shagu, na a ningmu ni, hpaji jaw mayu ai lam ni hte ga-san ni hpe anhte ni yawng hpe mung garan kachyan ya rit.

Nang Karai Kasang kaw na hpa myit mada taw nga nta?



Myi n mu ai la hpe Yesu tsi shamai ya ai
(Yawhan 9), Chartres Cathedral, France

Photo Credit: ©Jill Kimberly Hartwell Geoffrion, www.jillgeoffrion.com